

洞玄靈寶五老攝召北酆鬼魔赤書玉訣

此赤書乃學道之士之切要 惜其原闕 尚俟考補  
靈寶八威神策訣

當朱書三天太上召伏蛟龍虎豹山精文 著一銀木板上 又書記  
年月、師姓諱 著一板上 合二板 納囊裏 朱書次文 著一板上  
著囊外 凡三板合封為神策 如傳之狀

板悉用銀木 長一尺四寸 廣二寸四分 以絳紋之縉作囊 令  
長一丈二尺 衣之 封外板上 下頭印口中元始五老之章

當以柏函 絳文作衣 衣函以請策文 著別室 燒香左右 精  
心供養 受以佩身 天下神靈朝夕朝門 給五帝玉童、玉女各一十

二人 出入遊行 五帝侍衛 三界司迎 生死無復三惡之難 不經  
太山 逕升九天 衣飯自然 位同太極 要自成仙

受學道士佩此文 施行神咒 以策文指天 天神下 指地 地  
祇朝拜 三界束帶 指神 神禮 指鬼 鬼自滅爽 指水 水神通

大劫數交 洪災四會 以策召龍 龍為負身 長修積感 神靈交  
會 所在施召 舉嚮立到 千變萬化 適意所從 出入行來 位準

洞玄靈寶五老攝召北酆鬼魔赤書玉訣

清微藏書閣

太極 皆前導飛龍 後從天鈞 鳳嘯鸞鳴 十二華光建二七色節、

命靈之幡 精思九年 天儀自備

靈寶八威神咒

元始太真 五靈高尊 太華皓映 洞朗八門 五老告命 無幽

不關 上御九天 中制酆山 下領河海 十二水源 八威神咒 靈

策玉文 召龍負水 收氣聚雲 束魔送鬼 掃蕩妖心 萬精摧落

所誅無蠲 日月五星 北斗七元 諸天諸地 諸水諸山 玉真所部

冥靈大神 仙王遊宴 五帝伏幡 天丁前驅 金虎後奔 攫天猛

獸 羅備四門 所呼立到 所召立前 赤書煥落 風火無間 有所

攝檢 金龍驛傳 畢 叩齒九通 仰天三嘯 引天氣三咽 以策文

指所告之地 閉氣九息而止

元始五老鎮震求仙禳災玉訣

道士隱學 書青帝赤書真文 置東方 則東嶽仙官至 長齋百

日 精思靈寶尊神 則天真下降 給青要玉女九人 取東嶽神仙芝

草不死之藥 青帝鬼魔遠舍九萬里 一方凶悖惡獸、毒螫皆不生害

心 反善仁人 長齋修行二十四年 身得神仙 但佩此文 亦得屍

解 轉輪成仙

國土東方及春三月有災 欲使東鄉安鎮 當赤書青石上 鎮東

方九日 災自滅 凶逆自消 一方仁人 蒼龍來翔 善瑞自至 國

土太平 書文佩身 卻諸禍殃 身無患橫 常與神明相當 保國寧

家 享福無窮

道士書赤帝真文 置南方 則南嶽仙官至 長齋百日 精思靈

寶尊神 則天真下降 給朱陵玉女八人 取南嶽神仙芝草不死之藥

赤帝鬼魔遠舍八萬裏 一方凶悖惡獸毒螫皆不生害心 反善仁人

長齋修行二十四年 身得神仙 但佩此文 亦得屍解 轉輪成仙

國土南方及夏三月有災 欲使南鄉安鎮 當朱書赤石上 鎮南

方八日 災自滅 凶逆自消 一方仁人善瑞顯明 鳳凰來遊 白鸞

飛鳴 天人歌詠 欣國太平 書文佩身 萬天不生 禳凶卻穢 生

致神靈 福慶無窮 延年長生 家致興隆 國祚安寧

道士書黃帝真文 置中央 則中嶽仙官至 長齋百日 精思靈

寶尊神 則天真下降 給黃素玉女十二人 取中嶽神仙芝草不死之

藥 黃帝鬼魔遠舍十二萬裏 中央凶悖惡獸毒螫皆不生害心 反善

### 洞玄靈寶五老攝召北酆鬼魔赤書玉訣

清微藏書閣

仁人 長齋修行二十四年 身得神仙 但佩此文 亦得屍解 轉輪

成仙

國土中央及四季月有災 欲使中國安鎮 當朱書黃石上 鎮中

央十二日 災自滅 凶逆自消 四方和睦 善瑞自生 麒麟來歸

白虎遊庭 國豐民富 普天安寧 書文佩身 萬災不經 身康氣強

五官精明 長保家國 永亨利貞

道士書白帝真文 置西方 則西嶽仙官至 長齋百日 精思靈

寶尊神 則天真下降 給太素玉女六人 取西嶽神仙芝草不死之藥

白帝鬼魔遠舍六萬裏 西方凶悖惡獸毒螫皆不生害心 反善仁人

長齋修行二十四年 身得神仙 但佩此文 亦得屍解 轉輪成仙

國土西方及秋三月有災 欲使西鄉安鎮 當朱書白石上 置西

方六日 其方災自滅 凶逆自消 西方自歸 善祥來遊 靈獸飛軒

金雀銜符 五老歸賓 國寧民休 書文佩身 神明交遊 災不加

身 與五帝同廚 子孫昌熾 世享王侯 與善因緣 何慮何憂

道士書黑帝真文 置北方 則北嶽仙官至 長齋百日 精思靈

寶尊神 則天真下降 給太玄玉女五人 取北嶽神仙芝草不死之藥

黑帝鬼魔遠舍五萬裏 北方凶悖惡獸毒螫皆不生害心 反善仁人  
長齋修行二十四年 身得神仙 但佩此文 亦得屍解 轉輪成仙  
國土北方及冬三月有災 欲使北鄉安鎮 當朱書黑石上 置北  
方五日 其方災自消 凶惡自滅 北方自賓 善瑞日昌 地藏發泄  
金玉露形 天人歌詠 國富民豐 書文佩身 萬災消亡 壽同天  
地 福祿永光 所向所求 莫不利貞 子孫昌盛 世出賢明  
道言 學至道上法 修奉齋戒 思神念道 上希靈真 滅魔卻  
試 皆當先按靈寶上元舊格 施安真文 鎮於方面 靈真降室 五  
帝官屬侍衛門戶 鬼魔消滅 所向成從 赤書青帝真文於青繒上  
置室東壁 赤書赤帝真文絳繒上 置南壁 赤書黃帝真文黃繒上  
置中央 赤書白帝真文白繒上 置西壁 赤書黑帝真文黑繒上 置  
北壁 施安五篇於齋堂之中 朝暮燒香 隨方禮拜 不得雜俗異人  
幹入堂內 此皆方方各有威神 玉童、玉女侍衛 犯之奏罪九天  
冥考立加 奉者明慎禁忌  
九氣青天中有元始青靈之童 諱開陽青 典青帝赤書真文 青  
靈童長九寸 衣青羽衣 手執青麾 侍文左 學者應思此神降己身

### 洞玄靈寶五老攝召北酆鬼魔赤書玉訣

清微藏書閣

百日精念 靈真見形 所求立感 有佩真文 此童亦恒在己肝府  
之中 致青芽之精  
三氣丹天中有元始赤靈之童 諱丹心珠 典赤帝赤書真文 赤  
靈童長三寸 衣赤羽衣 手執赤節 侍文前 學者應思此神降己身  
百日精念 靈真見形 所求易感 有佩真文 此童亦恒在己心府  
之中 致赤芽之精

中央黃天中有元始黃靈之童 諱洪瑛 典黃帝赤書真文 黃靈  
童長一寸二分 衣黃羽衣 手執黃鉞 侍文中央 學者應思此神降  
己身 百日精念 靈真見形 所求立感 有佩真文 此童則恒在己  
脾府之中 致黃芽之精

七氣素天中有元始素靈之童 諱明石流 典白帝赤書真文 素  
靈之童長七寸 衣白羽衣 手執白旗侍文右 學者應思此神降己身  
百日精念 靈真見形 所求立感 有佩真文 此童則恒在己肺府  
之中 致素芽之精

五氣玄天中有元始黑靈之童 諱玉滋 典黑帝赤書真文 黑靈  
之童長五寸 衣黑羽衣 手執黑幢 侍文後 學者應思此神降己身

百日精念 靈真見形 所求立感 有佩真文 此童則恆在己腎府  
之中 致玄芽之精  
此五帝靈童與元始五老同生 主五篇真文 上統九天之氣 下  
領五嶽 中主人五藏 引五芽之精 補養人身 服食五芽 不知此  
神 終而無感 徒勞疲勤

洞玄靈寶五老攝召北酆鬼魔赤書玉訣竟

天運壬辰年寅月正一天師清微弟子洪鼎堅羅大英恭錄彙編

洞玄靈寶五老攝召北酆鬼魔赤書玉訣

清微藏書閣